

আন্তর্জাতিক

বলিভিয়ায় সামরিক ঘাঁটিতে বিস্ফোরণ, নিহত অন্তত ১০

প্রতিবেদক: আন্তর্জাতিক ডেস্ক

প্রকাশের তারিখ: শনিবার, ০৫ সেপ্টেম্বর ২০২৬, ০৫:০২ PM



বলিভিয়ায় একটি সামরিক ঘাঁটিতে ভয়াবহ বিস্ফোরণে অন্তত ১০ জন নিহত হয়েছেন। আহত হয়েছেন অন্তত ৫৮ জন। নিহতের সংখ্যা ১০ থেকে ১৫ জন হতে পারে বলে জানিয়েছেন স্থানীয় এক স্বাস্থ্য কর্মকর্তা।

গুত্রবার লা পাজ বিভাগের ভিয়াচা শহরের রেজিমিয়েস্তো ২ বলিভার সামরিক স্থাপনায় এ বিস্ফোরণ ঘটে।

স্থানীয় স্বাস্থ্য কর্মকর্তা রিতা নেব্রাস্কা জানিয়েছেন, বিস্ফোরণে নিহতের সংখ্যা ১০ থেকে ১৫ জনের মধ্যে হতে পারে। তবে হতাহতের চূড়ান্ত সংখ্যা এখনো নিশ্চিত করা হয়নি।

আহতদের মধ্যে বেসামরিক নাগরিক ও সামরিক সদস্য উভয়েই রয়েছেন। বলিভিয়ার প্রতিরক্ষামন্ত্রী এরনেস্তো জাস্তিনিয়ানো জানিয়েছেন, আহতদের মধ্যে ৫২ জন বেসামরিক নাগরিক এবং ছয়জন সামরিক সদস্য।

প্রাথমিকভাবে জানা গেছে, সামরিক স্থাপনার এমন একটি এলাকায় বিস্ফোরণ ঘটে, যেখানে আতশবাজি বা বিস্ফোরকজাতীয় সামগ্রী রাখা ছিল। তবে কী কারণে বিস্ফোরণ ঘটেছে, তা এখনো নিশ্চিত হওয়া যায়নি।

বিস্ফোরণের কারণ জানতে তদন্ত শুরু করেছে কর্তৃপক্ষ। একই সঙ্গে সেখানে বিস্ফোরক সামগ্রী কীভাবে সংরক্ষণ করা হয়েছিল, সেটিও খতিয়ে দেখা হচ্ছে।

স্থানীয় সংবাদমাধ্যমের খবরে বলা হয়েছে, বিস্ফোরণের প্রচণ্ড শব্দ ও কম্পনে আশপাশের এলাকায় আতঙ্ক ছড়িয়ে পড়ে। বিস্ফোরণের তীব্রতায় কাছাকাছি কয়েকটি বাড়ির জানালার কাচ ভেঙে যায়। সামরিক স্থাপনারও কিছু অংশ ক্ষতিগ্রস্ত হয়েছে।

খবর পেয়ে দ্রুত ঘটনাস্থলে অ্যাম্বুলেন্স ও নিরাপত্তা বাহিনীর সদস্যরা পৌঁছান। পরে পুরো এলাকা নিরাপত্তা বাহিনীর নিয়ন্ত্রণে নেওয়া হয়।

স্থানীয় প্রাথমিক প্রতিবেদনে প্রথমে দুটি বিস্ফোরণের কথা বলা হয়েছিল। প্রত্যক্ষদর্শীদের বরাত দিয়ে এসব প্রতিবেদনে বলা হয়, দ্বিতীয় বিস্ফোরণটি ছিল বেশি শক্তিশালী। এর ধাক্কায় সামরিক স্থাপনার আশপাশের কয়েকটি বাড়িও ক্ষতিগ্রস্ত হয়।

ঘটনার পর সাধারণ মানুষকে ঘটনাস্থল থেকে দূরে থাকার নির্দেশ দেয় সামরিক বাহিনী। আরও কোনো ঝুঁকি আছে কি না, তা যাচাই করতে নিরাপত্তাব্যবস্থাও জোরদার করা হয়।

বিস্ফোরণের সঠিক কারণ এবং হতাহতের চূড়ান্ত সংখ্যা নিয়ে এখনো আনুষ্ঠানিকভাবে বিস্তারিত জানানো হয়নি। উদ্ধার ও যাচাই কার্যক্রম শেষ হওয়ার পর মৃতের সংখ্যা পরিবর্তিত হতে পারে।

এর মধ্যে বলিভিয়ার সামরিক স্থাপনায় অস্ত্র ও গোলাবারুদ ব্যবস্থাপনা নিয়ে আলাদা তদন্ত চলছে। চলতি সপ্তাহে দেশটির প্রতিরক্ষা মন্ত্রণালয় জানিয়েছে, সান্তা ক্রুজ বিভাগের একটি সামরিক রেজিমেন্টের গুদাম থেকে ৩৩ হাজার ৬০৮টি ৫.৫৬×৪৫ মিমি গুলি নিখোঁজ হয়েছে। এ ঘটনায়ও তদন্ত চলছে।

তবে ভিয়াচার বিস্ফোরণের সঙ্গে নিখোঁজ গোলাবারুদের ঘটনার কোনো যোগসূত্র রয়েছে—এমন তথ্য এখন পর্যন্ত দেয়নি কর্তৃপক্ষ। বিস্ফোরণের প্রকৃত কারণ জানতে তদন্ত শেষ হওয়া পর্যন্ত অপেক্ষা করতে হবে।

সূত্র: ইন্ডিয়া টুডে

এ বিভাগের আরও খবর



২৪০ যাত্রী নিয়ে জাভা সাগরে নিখোঁজ জাহাজ
ইন্দোনেশিয়ার পূর্ব জাভা থেকে বোর্নিও দ্বীপের দক্ষিণ কালিমন্তানের পথে ২৪০ যাত্রী নিয়ে একটি যাত্রীবাহী জাহাজের যোগাযোগ বিচ্ছিন্ন হয়েছে। রবিবার...



সৌদি সামরিক ঘাঁটিতে হুথিদের মিসাইল-ড্রোন হামলা
সৌদি আরবের দক্ষিণাঞ্চলের একটি সামরিক ঘাঁটিতে মিসাইল ও ড্রোন হামলা চালিয়েছে ইয়েমেনের হুথি বিদ্রোহীরা। বাংলাদেশ সময় রোববার (১৩ সেপ্টেম্বর) মধ্য...



মধ্যপ্রাচ্যে আগ্রাসন ও একতরফা শৃঙ্খল আরোপে নিন্দা ব্রিকসের নেতাদের
জাতিসংঘে নিরাপত্তা পরিষদের (ইউএনএসসি) ঐক্যমোগত পরিবর্তন্য-সহ বহুপাক্ষীয় সংস্থাগুলোর সংস্কারের জোর দাবি জানিয়েছেন ব্রিকসের শীর্ষ নেতারা। পাশাপাশি...



হুথিদের হামলায় সৌদির জিজানে মসজিদসহ বহু স্থাপনা ক্ষতিগ্রস্ত
ইয়েমেনের হুথি বিদ্রোহীদের হামলায় সৌদি আরবের জিজান প্রদেশে একটি মসজিদসহ বহু ঘরবাড়ি ক্ষতিগ্রস্ত হয়েছে। সৌদি আরবের সিভিল ডিফেন্স জানিয়েছে, হুথি...

Copyright Dhaka Probe

অনলাইন সংস্করণ পড়তে ভিজিট করুন: <https://www.dhakaprobe.com/international/blibhiyay-samrik-ghantite-bisform-niht-ontt-10>